


Rhif 8
Haf 1999

'Y Gwir yn Erbyn y Byd!'

£1

Seren Tan Gwmwl

ffansin hanes annibynnol



Ho Chi Minh boi!

GOLYGYDDOL - DYMA'R NEGES!



Y bwrdd golygyddol...
fel maen nhw'n gweld eu hunain

Mae'r rhifyn hwn o Seren Tan Gwmwl yn son llawer am wledydd bychain wnaeth frwydro yn erbyn gelynion mwy pwerus na nhw: Nicaragua a Vietnam yn eu brwydrau arwrol yn erbyn Americanaeth; Gweriniaeth Sbaen a'i brwydr ddeu yn erbyn pwerau Ffasgaid Ewrop. I lawer o bobl roedd sefydlu'r Cynulliad Cymreig eleni yn benllanw brwydr Cymru dros ymreolaeth, yn ddiwedd brwydr hir dros gydnabod Cymru fel gwlad. Mae'n rhaid dysgu gwersi o wledydd fel Vietnam serch hynny. Gall feddu ar ei sefydliadau gwleidyddol ei hun, gall gael ei rhedeg gan bobl y wlad, ond nid yw'n wlad rydd. Mae diwylliant estron yn prysur goncro gwledydd, un sydd â grym cyfryngau torfol a chwmmiau economaidd enfawr y tu ôl iddo.



Y bwrdd golygyddol...
fel mae pawb arall yn eu gweld!

Yn yr un modd mae'n rhaid i Gymry peidio meddwl bod y Cynulliad yn cynnig atebion i bopeth. Un elfen o'n hymwybyddiaeth fel cenedl ydyw, ac un bychan iawn ar hynny. Y gwir amdani yw y gall sefydlu Cynulliad yng Nghaerdydd fod yn wrth-gynhyrchiol yn y pen draw. Mae Caerdydd wedi dod yn Fecca, a'r ofn mawr yw bod holl egni creadigol Cymru yn mynd i gael ei sianelu i'r brif ddinas, a thrwy hynny yn colli ei ystyr.

Y bwrdd golygyddol: Daniel Davies +
Owen Llywelyn *
John Tillman #

Mae bod yn rhydd yn dechrau yn y meddwl, nid mewn deddf seneddol. Mae'r pwyslais diweddar ar ddinasyddiaeth yn gall bod yn wâg iawn. Beth yw'r pwynt gyrru adref o swydd Gymraeg sy'n derbyn nawdd, gan wrando ar Radio Cymru, cyn cyrraedd adref i wyllo S4C. Rydym yn dod yn ddefnyddwyr goddefol, heb fewnbwn o gwbl, heb egni creadigol. Mae Cymreictod yn yr achos hwn yn golygu bod y ddefnyddiwr diwylliant estron sy'n digwydd siarad Cymraeg.

Seren Tan Gwmwl:


Y Fflat, Clwb Dewi Sant, 35 Eastgate, Aberystwyth +
7 Ffynnon Jôb, Caerfyrddin 01267 233588 *
Fflat 36D, Plaza y Luis Menotti, Rosario, Yr Ariannin #

Ar yr un pryd mae cyfryngau torfol Cymru yn ceisio darlunio Cymreictod fel rhywbeth dinesig, gan wawdio unrhyw beth nad yw'n gosmopolitan. Pobl sy'n bwyta seilej a chwarae coits yw unrhyw un sy'n byw i'r dwyrain o Benybont, fra boc Caerdydd soffistigedig yn eangfrydig. Au contraire!

Mae bywyd Cymraeg yn bodoli y tu hwnt i Gaerdydd, a hwn sy'n rhoi'r sail i'r sefydliadau Cymraeg hynny sy'n prysur tynnu pobl i'r brif ddinas. Mewn ffordd felly mae cryfder a llwyddiant y Gymraeg mewn meysydd fel y cyfryngau torfo statws, a'r Cynulliad newydd yn arwain at ei gwanhau yng ngweddill Cymru. Mae'r mêr yn cael ei dynnu o asgwrn cefn Cymru.



Pob lwc i Seren Tan
Gwmwl bois, Terry.



Rydym eisioes wedi derbyn Cynulliad - nawr mae'n bryd cael datganoli gwirioneddol, a thrwy hynny symud rhai o'r prif sefydliadau Cymraeg o'r brif ddinas. Mae prisiau tai wedi dechrau codi eto yng nghefn gwlad Cymru, a symud mawr wedi bod ar y farchnad dai eleni. Mae'r ail fewnlifiad wedi dechrau, ac os gollwn ni'r frwydr honno yn y gorllewin, fydd dim byd ar ôl.

60 mlynedd yn ôl..... Ar Fawrth 27, 1939 daeth Rhyfel Cartref Sbaen i ben pan gipiwyd Madrid gan y Ffasgwyr dan arweiniad y Cadfridog Franco. Arweiniodd hyn at lofruddio 200,000 o bobl gan Franco rhwng 1939 ac 1944, ac anfon dros filiwn o bobl Sbaen i wersylloedd gwaith. Arweiniodd hefyd at bron i ddeugain mlynedd o lywodraeth ffasgaidd creulon ac unbeniaethol yn Sbaen tan marwolaeth Franco yn 1975.

Mae hanes y Rhyfel Cartref ddigwyddodd yn Sbaen rhwng 1936 ac 1939 erbyn hyn yn dechrau cael ei anghofio. Roedd brwydr llywodraeth ddemocrataidd Sbaen gafodd ei hethol yn 1936 yn erbyn yr arweinydd milwrol Franco yn un arwrol. Ar ochr y llywodraeth - y Weriniaeth - ymladdodd sosialwyr, comiwnyddion, anarchwyr, rhyddfrydwyr a phobl o wledydd eraill oedd yn credu mewn rhyddid a democratiaeth. Yn y rhyfel hwn ymladdodd Eric Arthur Blair (George Orwell) ac Ernest Hemingway. Ond mae Seren Tan Gwmwl yn cofio heddiw y 174 o Gymry aeth i ymladd gyda'r Frigâd Ryngwladol yn Rhyfel Cartref Sbaen, a'r modd y gwnaeth Cymru fel gwlad gefnogi brwydr arwrol ein brodyr yn Sbaen dros ryddid, democratiaeth a sosialaeth.

O'r 174 o Gymry aeth i ymladd yn Sbaen roedd 122 yn dod o'r cymoedd glo yn y De, a 34 o borthladdoedd glo cyfagos. Brwydr ddosbarth oedd y rhyfel iddyn nhw. Brwydr yn erbyn y gelyn Ffasgaidd oedd yn prysur sathru ar hawliau democrataidd gweithwyr ar hyd a lled Ewrop, ac yn Sbaen roedd yn frwydr yn erbyn ceidwadaeth oedd yn credu mewn cadw tir yn nwylo'r tiffeddianwr a'r eglwys, a chadw breintiau dosbarth.

Ar y pryd doedd llywodraeth Prydain ddim am ymladd yn erbyn Ffasgiaeth yn Ewrop. Roedd yn credu cymaint mewn aros yn niwtral fel ei bod yn anghyfreithlon i Brydeinwyr fynd i ymladd yn Sbaen: bu'n rhaid i'r Blaid Gomiwnyddol ym Mhrydain felly drefnu bod llawer o'r Cymry oedd yn mynd i ymladd yn Sbaen yn cael eu 'smyglo' i'r cyfandir er mwyn iddyn nhw gael ymuno gyda'r Frigâd Ryngwladol - sef byddin o bobl asgell chwith o wahanol wledydd oedd yn credu'n ddigon cryf yn achos Sbaen i farw drosti. Yr unig wledydd i ymyrryd yn y Rhyfel oedd Yr Almaen, Yr Eidal a Phortiwgal ar ochr y Ffasgwyr, a Mexico a Rwsia ar ochr y Weriniaeth.

Yng Nghymru'r 1930'au roedd diweithdra a newyn yn gyffredin, ac o'r ardaloedd ddiodeffodd waethaf y daeth yr arwyr aeth i ymladd yn Sbaen. Roedd o leiaf 20% o'r Frigâd Ryngwladol Brydeinig wedi bod yn y carchar o'r blaen am frwydro dros hawliau gweithwyr ym Mhrydain. O'r llinell biced, o'r Orymdaith Newyn, o'r brotest yn erbyn y Prawf Moddion fe deithion nhw i Sbaen i ymladd yn erbyn Ffasgiaeth o fath arall. Un gelyn oedd ganddyn nhw, ac roedd hwnnw yn ymddangos yn Ne Cymru ac yn Sbaen ar ffurf tlodi a newyn. Talwyd teyrnged iddyn nhw gan un o arweinwyr y Weriniaeth yn Sbaen, Dolores Ibarvin, neu *La Pasionara*, pan ddywedodd.....

Fe ddaethon nhw i'n gwlad ar grwsâd dros ryddid a democratiaeth i ymladd a marw dros Sbaen. Fe roddon nhw bopeth i ni, ac fe ddaethon nhw a dweud wrthon ni 'Eich hachos chi, achos Sbaen, yw ein hachos ni. Dylai pob person gwâr frwydro dros yr achos hon'


O gymoedd tlodi uffernol De Cymru daeth milwyr y Frigâd Ryngwladol. Ond o'r cymoedd hynny hefyd y daeth cefnogaeth ariannol a nwyddau i'r Weriniaeth yn Sbaen. Rhoddodd pobl dlawd De Cymru yn hael i'r frwydr yn Sbaen er bod dirwasgiad yn rhemp yno, a chanran uchel o'r bobl yn ddiwaith ac yn diodeff eu hunain o dlodi a newyn. Yn Awst 1936 cynhaliwyd cyfarfod protest enfawr i gefnogi'r Weriniaeth yng Nghastell Nedd gyda dros 10,000 o bobl yn bresennol. Daeth pentref bach Brechfa yn Sir Gaerfyrddin yn ganolfan bwysig ar gyfer derbyn plant amddifad o Wlad y Basg. Defnyddiodd Potato Joe o Abertawe ei longau i dorri'r blocâd a mynd â bwyd i'r bobl oedd yn ymladd dros y Weriniaeth.

Mae'r ffaith bod cymaint o Gymry yn fodlon ymladd dros eu cydweithwyr yn Sbaen yn rhan bwysig o hanes ein gwlad. *If you tolerate this, then your children will be next* yw esboniad y *Manic Street Preachers* o resymau'r bobl hyn dros fynd i ymladd yn Sbaen. Gwelent hi fel brwydr dros bopeth oedd yn dda: dros hawliau gweithwyr a phobl gyffredin, dros ddemocratiaeth, a dros sosialaeth. Mae un cymeriad yn nofel Lewis Jones *We Live* yn dweud hyn wrth ei gariad y noson cyn ei fod yn dychwelyd i Sbaen i ymladd.

Cofia, rwy'n falch o gael dychwelyd atyn nhw yfory. Rwy wedi bod gyda nhw drwy mywyd. Yn ein cartrefi, y pwll glo, y Fed a'r Blaid Gomiwnyddol. Mae'r streiciau a'r protestio a'r gorymdeithio wedi fy arwain yn uniongyrchol at hyn, y rhyfel dros ddemocratiaeth.

Colli'r Rhyfel Cartref wnaeth y Weriniaeth yn y pen draw, a hynny oherwydd triciau brwnt Stalin yn cefnogi'r Comiwnyddion yn unig, y ffaith bod Hitler a Mussolini wedi rhoi cefnogaeth anferth i'w cyd-Ffasgydd Franco, a'r ffaith bod llywodraethau Prydain a Ffrainc wedi aros yn niwtral. Ond mewn gwirionedd nid colli wnaeth y Cymry aeth i frwydro dros sosialaeth a democratiaeth yn Sbaen. Fe wnaethon nhw beryglu eu bywydau dros ddelfryd, ac mae eu cri, a chri *La Pasionara* a'r Weriniaeth dros Sbaen rydd, sosialaidd, yn dal i gael ei hadleisio ble mae pobl gyffredin yn ymladd yn erbyn gormes - NO PASARAN!

Cân caniadau'r byd o glwyfau Sbaen.



POUM POUM!

Pwy wnaeth ennill yn Vietnam?

Pan fydd hanes yr ugeinfed ganrif yn cael ei ysgrifennu fe fydd enw Ho Chi Minh yn un amlwg iawn. Hwn yw'r dyn wnaeth arwain gwlad fechan, annatblygedig yn erbyn pŵer milwrol mwya'r byd... ac ennill.

Pan rannwyd y wlad ar hyd llinell orweddol 17 yn 1954 daeth Gogledd Vietnam yn wlad gomiwnyddol, a'r de'n wlad gyfalafol. Roedd etholiadau i fod i gael eu cynnal i ail-uno'r wlad yn 1956, ond cyn hynny roedd llywodraeth Eisenhower wedi dechrau cefnogi'r de cyfalafol ac yn awyddus i'w hatal rhag troi'n gomiwnyddol. Erbyn 1960 roedd Arlywydd Gogledd Vietnam, Ho Chi Minh wedi datgan ei fod yn barod i frwydro i uno'r wlad, ac ymateb JFK yn 1961 oedd i ddechrau anfon 'ymgynghorwyr milwrol' i gefnogi llywodraeth y De. Yn 1964 ymunodd Unol Daleithiau'r America â'r rhyfel yn swyddogol.

Onid doedd yr Americanwyr ddim yn ymwybodol o athrylith Ho Chi Minh, na dyfeisgarwch a dyfal barhad pobl Vietnam. Yn y de sefydlwyd y grŵp *guerilla* y Vietcong i frwydro yn erbyn milwyr America. Fe ddefnyddiodd rhain dactegau nad oedd yr Americanwyr yn gyfarwydd â nhw, na'n medru gwneud dim amdanynt. Crewyd rhydwraith o dwneli cudd gan y VC ble gallent guddio am ddiwrnodau cyn dod nôl i'r wyneb i frwydro. Yn ystod y dydd byddent yn toddi mewn i'r boblogaeth gynhenid, ac yn y nos yn dod allan unwaith eto i ymladd yr Americanwyr. Carient arfau o'r gogledd i'r de ar hyd Llwybr Ho Chi Minh, oedd yn cynnwys rhannau helaeth o jnglyn Cambodia a Laos.

Arweiniodd hyn at dactegau erchyll ar ran yr Americanwyr. Byddent yn mynd ar deithiau *search and destroy* ac yn llosgi pentrefi cyfan, gan ladd pobl ddiniwed fel wnaeth ddigwydd yn My Lai. Byddent yn bomio ardaloedd cyfan o'u hawyrennau B-52, ac yn defnyddio Napalm ac Agent Orange er mwyn lladd popeth mewn ardal arbennig.

Yn ystod y rhyfel bu farw 2 filiwn o bobl Vietnam, a chlwyfwyd mwy na hynny. Llwyddodd gwlad fechan i guro grym milwrol Unol Daleithiau'r America. Yr ofn mawr yw bod pethau wedi newid cymaint erbyn heddiw fel bod y brwydro wedi bod yn ofer.

HO! HO! HO!

Erbyn heddiw gallwch gerdded i lawr y brif stryd yn Hanoi a chael eich twyllo eich bod mewn gwlad sy'n estyniad o America. Ho Chi Minh a'i filwyr enillodd y rhyfel yn erbyn America, ond mae'r rhyfel economaidd ffyrnig yn erbyn Vietnam sydd wedi digwydd ers 1973 wedi gorfodi'r wlad i fabwysiadu rhai o agweddau gwaethaf cyfalafiaeth. Byddai Ho Chi Minh yn troi yn ei fedd o weld y *backpackers*, y gwyr busnes o Japan ac America, y twristiaid yn mynd ar deithiau o gwmpas twneli'r Vietcong, a'r dyn Malboro yn ei het gowboi sydd i'w weld ar bosteri hysbysebu.

Yn 1981 pasiodd Cyngres America Ddeddf Masnachu â'r Gelyn oedd yn golygu nad oedd America allforio gwirfoddol fel Oxfam. Ymunodd Thatcher yn y dial, a llwyddodd i berswadio'r Gymuned Ewropeaidd i beidio allforio llaeth i blant Fietnam. Aeth America ati i arfogi a chefnogi yr unben gwallgof Pol Pot a'r Khmer Rouge yn eu brwydr yn erbyn Vietnam.

Pan arwyddodd America gadoediad gyda llywodraeth Gomiwnyddol Gogledd Vietnam yn 1973 addawodd Nixon fel rhan o'r cytundeb y byddai Vietnam yn derbyn ad-daliadau gwerth \$3 biliwn am y difrod achoswyd gan y rhyfel. Byddai llywodraeth Vietnam wedyn yn gwario'r arian hwn ar ail-adeiladu eu gwlad, gan ddefnyddio cwmnïau Americanaidd i wneud hynny. Gwrthododd America dalu'r arian: yn waeth na hynny ymosododd yn economaidd ar Vietnam a rhewi ei hasedau. Gwrthododd adael i gwmnïau Americanaidd fasnachu â hi, a pherswadiodd Banc y Byd i beidio gwario arian roedd wedi addo ar gyfer dyfrhau tir.

Erbyn 1986 roedd prisiau wedi codi i'r fath raddau fel bod y Politburo yn Vietnam i gyd wedi ymddiswyddo gyda'i gilydd. Yn y flwyddyn honno daeth Nguyen Van Linh yn arweinydd newydd ar Vietnam. Hwn oedd Gorbachev Vietnam, ond yn wahanol i Gorbachev nid oedd ganddo egwyddorion o unrhyw fath. Yn 6ed Cyngres y Blaid Gomiwnyddol yn Rhagfyr 1986 cyhoeddodd ragler economaidd newydd - Doi Moi, neu ail-adeiladu. Roedd Doi Moi, mewn gwirionedd yn golygu gwerthu pob egwyddor yr ymladdodd Viet Minh a'r Vietcong mor galed drostyn nhw.